

Seigneur, ie ne le merite pas: Deliberez de ma demeure apres la mort; ie ne lairray pas de vous benir dans les enfers, si vous m'y voulez enuoyer: l'y loueray vos misericordes, & l'amour que vous aurez eu pour moy, & ie diray que ie m'en suis rendu indigne: ie vous y aimeray, & alors ie vous y offriray mes peines: faites sur moy vos volonte: Mais puisque les grands Saints ont tant souffert pour vous dès cette vie, faites au plustost que ie fois digne de souffrir ce qu'ils ont souffert, que ie patisse & que ie meure pour la foy.

Ce bon homme ne pensoit pas alors estre entendu, estant luy seul dans la Chappelle: mais vn de nos Peres qui furuint à la fin de son oraison, eut assez bonne oreille pour en recueillir quelques restes, & entr'autres ce peu que ie viens de dire. Et quelque temps apres le Pere luy ayant demandé, qui [35] luy auoit enseigné cette priere: Personne, respondit il; mais ie sentoie dans le fond de mon cœur, que Nostre Seigneur me reprochoit le peu que i'ay fait pour luy: & me faisant connoistre en mesme temps l'amour qu'il m'a porté, & l'amour que luy ont porté Saint Paul & tant de Saints Martyrs, i'auois honte de l'aimer si peu, & ne sçauois où me cacher dans cette confusion, sinon dedans l'Enfer; ie n'en auois aucune horreur, ne songeant alors à aucune autre chose, sinon que i'eusse tout voulu souffrir pour Dieu.

Ce bon homme fera les heures, & quelquefois les nuicts quasi entieres en Oraison, & d'ordinaire deux, trois & quatre fois le iour, au milieu de la Chappelle, nonobstant les plus grandes rigueurs du froid; la teste, les pieds & les iambes toutes nuës, couuert seulement d'une peau de quelque beste sauage: